



Iskušenje droge, štetnosti i putevi suprotstavljanja (Meka)

Hatib: dr. Abdurrahman ibn Abdulaziz es-Sudejs

6. džumadel-uhra 1444. po Hidžri / 30. decembar 2022.

Beskrajna hvala Allahu, koji nas je obdario razumom, opažanjem i razumijevanjem. Hvalimo Ga i zahvaljujemo Mu na neprestanim blagodatima. Svjedočim da nema boga osim Allaha, jedinog, Koji druga nema, i Koji prijeti propašću onima koji čine nered i štetu na Zemlji, i svjedočim da je naš vjerovjesnik i prvak Muhammed, sallallahu alejhi ve sellem, Allahov rob i poslanik, najbolji čovjek ponašanjem i porijeklom, neka su na njega Allahova milost, blagoslov i spas, i na njegovu porodicu i ashabe, najbolju generaciju muslimana, i tabiine i sve one koji ih slijede u dobročinstvu, nadajući se Allahovoj blizini, sve do Sudnjeg dana. Najbolja oporuka je oporuka bogobojažnosti i strahopoštovanja prema Gospodaru svih stvorenja. "I onim, što vam je potrebno za put, snabdijte se. A najbolja opskrba je bogobojažnost." (El-Bekara, 197)

O muslimani, u ovom historijskom trenutku, islamski ummet prolazi kroz teška iskušenja, i oluje destruktivnih izazova, poput sveuništavajućih poplava i vjetrova. Najopasnija od tih iskušenja su ona koja uništavaju ljudski razum, bilo da se radi o destruktivim i zabludjelim ideologijama, ili opijatima i drogama. Razum i opažanje su dvije najplemenitije i najdragocjenije blagodati kojima je Stvoritelj obdario čovjeka, jer one uzdižu čovjeka, daju mu vrijednost i udaljavaju ga od posrnuća i pada. O vjernici, čista vjera islam došla je sa propisima, načelima i normama kojima se postiže dobro/korist ovog i budućeg svijeta. Veliki islamski učenjak Gazali, Allah mu se smilovao, rekao je: "Intencija šerijata, prema Božijim stvorenjima, je da zaštiti pet temeljnih vrijednosti: njihovu vjeru, život, razum, potomstvo i imetak, pa sve što čuva ovih pet temelja, smatra se maslehom (korišću), a sve što ih narušava, smatra se mefsedom (štetom), a otklanjanje štete također je korist." Allah, džellešanuhu, zabranio je sve ono što uzrokuje štetu na ovom i budućem svijetu, pa je tako zabranio





alkohol i opojna sredstva. Uzvišeni kaže: "O vjernici, vino i kocka i kumiri i strelice za gatanje su odvratne stvari, šejtanovo djelo; zato se toga klonite da biste postigli što želite." (El-Maida, 90)

Imami Ahmed i Ebu Davud bilježe od Ummu Seleme, radijallahu anha, da je rekla: "Allahov Poslanik, sallallahu alejhi ve sellem, zabranio je sve što opija i opušta, omamljuje tijelo." A u hadisu Ibn Omera, radijallahu anhum, navodi se da je Vjerovjesnik, sallallahu alejhi ve sellem, rekao: "Allah je prokleo alkohol, i onoga ko ga pije, i ko ga toči, i ko ga prodaje, i ko ga kupuje, i ko ga cijedi, i kome se cijedi, ko ga nosi i kome se nosi." (Ebu Davud)

Mudrost zabrane opojnih sredstava i droga ogleda se u tome da one uništavaju ono najvrednije kod čovjeka, a to je njegov razum, koji je osnovni uvjet zaduženja i zakonske i moralne odgovornosti u islamu, i zato se posebnim šerijatskim tekstovima propisuje čuvanje razuma. Imam Šatibi kaže: "Šerijat propisuje čuvanje ljudskog razuma u smislu njegovog unapređenja i nepovređivanja." Također, proizvodnjom, prodajom i korištenjem droga i opojnih sredstava uništava se imovina, ugrožavaju ljudski životi, ruši ljudsko dostojanstvo, uzrokuje prolijevanje nedužne krvi i druga djela koja je Allah strogo zabranio. S porastom broja korisnika droge u nekom društvu, povećava se stopa kriminalnih djela. Droga je zlo koje uništava vjeru, razum, zdravlje, mrska je Milostivom, ona je pogan, šejtanovo djelo, slabi vjeru i vjerovanje, pošast je i otrov ovog vremena, rak-rana naroda i uništitelj društva. Statistike potvrđuju da je droga uzrok više od 40 % krivičnih djela, i više od 60 % posto zločina sa društvenim implikacijama, da nas Allah sačuva i zaštiti. Istraživanjem uzroka širenja ovog zla, a posebno među mladim ljudima, dolazimo do sljedećeg zaključka: glavni i osnovni uzrok je slabljenje vjerske svijesti, pad nivoa islamskog odgoja u mnogim generacijama, nezaposlenost, slobodno vrijeme, slijepo slijeđenje i loše društvo, uz pomanjkanje vjerskog znanja i prakse u nekim muslimanskim zajednicama.

Među najozbiljnijim opasnostima koje prijete muslimanskim društvima jeste činjenica da neki mladići, a možda i djevojke, upadaju u zamku lošeg društva, a neke





društvene mreže promovišu devijacije u ponašanju, droge i psihoaktivne supstance, pod izgovorom njihovog korištenja kao stimulansa, sedativa i u svrhu popravljavanja raspoloženja i bistrenja uma. Neki su već ozbiljno iskušani zlom droge, njenom upotrebom, promocijom, krijumčarenjem i prodajom, i gotovo nepovratno idu putem ovisnosti, samodestrukcije, izgubljenosti pa i samoubistva, da nas Allah sačuva tog zla.

Ukratko, onog momenta kada je oslabila vjera kod ljudi, povećalo se nepoznavanje šerijatskih propisa, a materijalizam prevladao, olakšan je posao onima koji imaju destruktivne namjere i planove u muslimanskim društvima, pa je cijela stvar kulminirala u veliki izazov i žestok i očigledan rat, koji je proprimio različite oblike i forme. Heroin, pilule, droga za žvakanje, kristal met, tablete amfetamina, i druge vrste narkotika postali su oružje u opasnom ratu, a za krijumčarenje i distribuciju toga koriste razne stvari, od plemenitih knjiga, voća, robe široke potrošnje, pa do automobilskih guma.

Poštovani vjernici, nakon dijagnosticiranja ove opake bolesti, i saznanja o njenom ubitačnom djelovanju, neophodno je preduzeti preventivne mjere kako bismo se suprotstavili ovoj neposrednoj opasnosti, prije nego što ona eskalira i ne prouzrokuje nepopravljive štete, boriti se protiv nje riječima i djelima. Prvi i najvažniji korak jeste: jačanje vjerske svijesti, tj. svijesti o Božijem nadzoru, sveznanju i sveprisutnosti, poštivanju i veličanju Njegovih naredbi i zabrana, te postizanje umjerenosti i srednjeg puta. Naš vjerovjesnik (šerijat) je izgradnja i prosperitet, a ne rušenje i uništenje, poziva svakom dobru, a zabranjuje i odvraća od svakog zla. "... a onaj kome Allah ne da svjetlo neće svjetla ni imati." (En-Nur, 40)

Drugi korak je prevencija i podizanje obrazovnog i etičkog nivoa društva, što podrazumijeva uspon duše kroz izgradnju zdrave moralne, koherentne, jake i stabilne ličnosti, čiji je primjer i uzor vjerovjesnik Muhammed, sallallahu alejhi ve sellem, nosilac najljepših osobina i najveće dobrote. Ovdje posebno dolazi do izražaja odgovornost kuće, porodice, roditelja, škole, džamije i ostalih odgojnih instanci.





Koliko je mladih ljudi koji su koristili drogu dok ih ona nije uništila i oduzela im živote. Neka je ovo zlo daleko od naših kuća i nas samih, amin!

Isto tako, potrebno je provesti što rigoroznije mjere prema onima koji prouzrokuju nered u muslimanskim društvima, uključujući krijumčare i promotore, koje podrazumijevaju otkrivanje njihovih imena, rasvjetljavanje njihovih aktivnosti, provođenje Božijih propisa nad njima, razbijanje njihovih ćelija i nulta tolerancija prema njima, jer oni ometaju izgradnju kompaktnog društva, a to je upravo ono što rade vlasti ove zemlje, neka im Allah podari uspjeh u tome.

Mladići i djevojke, budite odgovorni, ne dozvolite da vam droga pomuti razum i odvрати vas od unapređenja vaše zajednice i vaših života. Naša vjerska, moralna i patriotska dužnost obavezuje svakoga od nas, a posebno mladiće i djevojke, da izvršavamo svoje dužnosti. Budimo jedna ruka pred smutljivcima i neprijateljima svetinja, vjere i domovine, svim silama suprotstavimo se krijumčarima ovih opasnih otrova u našem društvu. Allaha molimo da zaštiti našu vjeru, naše živote, naš razum, naš imetak i našu čast, On je Darežljivi i Plemeniti.

Ummete islama, u ovim teškim vremenima posebnu pažnju potrebno je usmjeriti na borbu protiv prodaje, konzumiranja i rasturanja opojnih droga, kako bismo zaštitili svoje mladiće i djevojke, koji su stub i budućnost ummeta. Posebna odgovornost, u tom smislu, pada na pleća učenjaka, daija, odgajatelja, mislilaca, novinara i ljudi od pera, svi ste vi pastiri, i svako od vas bit će pitan za svoje stado. Obaveza je, po svaku cijenu, očuvati kompaktnost porodice i društva, otvoriti prostor za konstruktivan dijalog s mladim ljudima i kreirati povoljan ekonomski i poslovni ambijent za njih, kako bi imali što manje slobodnog vremena i praznog prostora, a da bi se to postiglo potrebna je bliska saradnja države, imućnih ljudi i biznismena. Svako normalno društvo teži očuvanju i zaštiti mladih naraštaja od negativnih ideoloških utjecaja koji ih mogu odvesti krivim putem, prije svega putem uživanja opojnih supstanci i ovisnosti. Allah zaštitio našu omladinu od svakog zla i nedaće, i sačuvao nam sigurnost, blagostanje, našu vjeru i državu, On je uistinu blizu i uslišava molbe.





"KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJJE
KOJU TOKOM HUTBE ELABORIRA." (PREPOROD)

HUTBE 

Donosite salavate i selame na najbolje stvorenje, kao što vam je naredio vaš
Gospodar, u tajnosti i javnosti, rekavši: "Allah i meleki Njegovi blagosiljaju
Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

